

法京中如此至於外方則未及佩持之人應亦甚多依前啓辭之意京中則三月初一日外方則四月初一日又定追錄之限使之無遺畢佩然後方為一一摘發依法施行似為宜當從之○辛卯唐人高益等三十二名漂到濟州牧使成安義啓閭禮曹請令整舫出送亦令沿海另加護送從之○壬辰備邊司因義州府尹李莞馳啓覆啓曰易叅將承惠久留義州與李莞情義相親而頗能禁戢遼民境內粗安誠為多幸而今閭諺說甚多將不得自保云易將之去留而一境之利害關焉在我不可無周旋挽留之策體臣伴臣處並知會此意俾將承惠被誣之情陳辨於督府從之○夜一更月出時青赤氣如柱自東方至西貫月長可二丈許廣尺餘○癸巳號牌廳啓曰今此號牌之法蓋欲知民丁摠數及有役無役以為後日變通之地而外方守令不體朝廷之意多有徑先侵責之弊且民丁之數大邑不如小邑者頗多守令之不能著實舉行據此可知至於入籍之中或以良為賤或以他主為己主或以他奴為己奴或以少為老或無役而冒稱有役若任其冒錄而不為查覈則朝廷立法之意有名無實今宜另擇剛明御史待春和發送巡行列邑按籍詳查其有冒錄之類一依事目論罪或時變服暗行出入閭閻詳加探訪守令之徑先定役者論以違令私徵米布者論以贓律牌限已過之後閭里有不佩牌者依事目集示並治